

廣東歷代詩僧簡介（十九）

慧光居士

今普

今普字願海。其先姑蘇人，居廣州，姓朱，父字未央，風流宕逸，工篆刻，普其長子也。質實古樸，言辭簡約而善諷，不見喜愠之色。初求天老人出世，人多易之，迨受具辦道，人皆遜其能。入侍文室，充丹霞化主，諸貴游愛樂其誠，瓢笠徧於嶺外，後歸終雷峯。弟大嚴亦爲僧海幢，兄弟皆精篆刻。

露珠

荷瀉曾疑合浦飛。那知出處示微微。青蓮花裏重逢易。紅雪爐中乍見稀。蘭麝香氛垂素幙。珊瑚枕冷掩層幃。任教玉線穿難就。何況羅珍袖得歸。

梅影

獨坐三更對紙屏。漸移疏影立中庭。驀驚水墨圖皴壁。忽訝寒雲渡遠汀。燈下豈能藏瘦骨。風前誰與辨眞形。因思此夕羅浮夢。月落空林正欲醒。

爲丹霞一象募布

誰憐一象苦寒侵。猶著生衣縮項深。偏袒右肩還立雪。露穿雙肘獨行吟。休言遊手空擎鉢。長望慈雲覆短衾。巖畔向陽如挾纊。况施千丈被遙岑。

今足

今足字一麟，肇慶府高要人，陸姓，有聲鬻序，平生喜布施，信因果。其母尤虔奉三寶，盡損金貲，莊嚴鼎湖三世佛相，飯僧施糲，迨無虛日。足棄諸生出世雷峯，丁巳受具，次日即奉命棲賢，遂腰包度嶺行，持一鉢於戎馬倥傯之際，不避嶺巖，皆能化導

強暴。走吳越秦晉，所過大刹，無不徧參，諸方大老率以重職推轂，皆遜辭不受，惓惓以棲賢建立爲念。丁丑募緣返粵。歸省墓田。偶病而終。子爲諸生。女度爲尼。

擬禮五臺途中阻雪宿郵亭菴

象王宮起太行西。突兀當空雪不迷。十里香花趨磴道。一肩雲水宿招提。寒燈共聚南詢客。土堞遙聽北戍鷄。無限廢興塵刹事。明朝思問老闍黎。

奉和靜成牡丹

天與芬芳色奪妍。含風和露靜娟娟。無言自吐馨香意。微笑誰知婀娜傳。不入御園催麗句。獨臨精舍映枯禪。高枝若使能移接。繞座繁英出檻前。

柳溪訪角子大師

深隱何當混鹿羣。一灣流水一鬢雲。溪邊菜葉誰曾見。屋後瓜畦半自耘。雨過疏林無虎跡。春回空谷有蘭芬。休將道眼輕塵劫。行見燈王座欲分。

今樹

過遠公西郊新蘭若

愛君居近粵城邊。築得方池好種蓮。晝捲竹簾圖遠嶽。時翻貝葉對平田。風香芬馥花容冶。天氣清和雀舌圓。自愧出門無可詣。惟於此地獨流連。

古雲

古雲字雲菴，增城舉人周湛子，棄諸生從阿字出家。時金給事堡亦著僧衣，在海幢，古雲因請堡以甘泉心性之學及白沙靜定端倪

之旨，堡曰我亦從此來。良久再問，堡即起去。古雲沈吟曰此老所學飽飫，豈欺我哉。遂焚書籍筆硯，一意修靜，潛行密證，長養聖胎，益信陳湛所傳爲不虛云。後繼阿字主海幢；年八十入寂。

讀蘭湖詩集奉贈心公

昨夢蒼龍吟巨壑。萬里電颯常噴薄。一幅丹青幻杳冥。攪動波濤紛灑落。又見丈夫秀而雄。手按星文發新鏢。幾回聽罷曉鐘聲。忽報人來湖上約。五色雲章寫素心。閉函已訝齊盧駱。心公慶喜是前身。慧業文思恣磅礴。性空潭裏朗蟾蜍。人望雲間鳴鶯鶩。披襟永日楚臺風。渙然賓主忘酬酢。篋中鴻寶許誰看。被我驚起蒼龍蟠。丈夫之劍亦躍出。方見夢時心膽寒。滴滴含珠顆。片片成琅玕。初如霄廓笙響亮。漸似日輝錦簇攢。亦類冲天鷗掠兔。金睛鍊爪突林巒。建安標格大歷骨。今昔權衡安可忽。古詩魏晉近唐人。欲得驪珠先探窟。青細讀盡幾經春。蘭湖光怪終難汨。孫公瀟灑墨兵年。陸氏淹通書廚日。琢句鍊局如有神。卓然作者自超羣。更聞畫做顧虎頭。復說字窺王右軍。歸來不覺三歎息。書破濤箋快絕倫。

次答心公見貽時寓六榕鍊公南堂

偶倦水雲興。因棲寶塔傍。隔城同好月。靜室猶焚香。雨足芳菲候。鶯啼歲月忘。勞師寄高詠。流徵滿南堂。

同樗木敏言諸子集法性寺

南離值炎天。冠蓋紛奔馳。人物繁且美。荔支五日垂。冰盤列珊瑚。玳筵錯珠璣。射覆引興長。賦詩盡朵頤。而我茲蒨倫。迢迢赴幽期。郊西萬頃林。蓮花紛四陲。白藕連稻田。紅菱雜荇絲。其中法性院。招邀有遠師。坐我崖籐簾。滑凍忘暑疲。言茲荔最佳。不賞欲何爲。登樓騁遠矚。雲山抱釣磯。蒼蒼古木森。徐徐來清颺。遲爾南堂子。共和靈洲詩。

羅浮詩

高高萬仞濕衣寒。天外孤筇不怕難。絕壁眼空低盡放。平崖

魂倦繞初安。啼殘山鳥人偏老。摘得琪花與自寬。且把雲菴籠日影。好聲吟與葛洪看。

藥生樵徑不知名。石澗潺湲盡日聽。萬壑繞衣沾老桂。二樓閃眼小重溟。雲中古觀珠花樹。松下香臺貝葉經。猿聽鶴歸無限意。人間誰是夢初醒。

陳顥菴先生讀雲菴詩絕句：澹歸默示最沉吟。破筆焚書剩一心。從此來時從此去。芳菲歲月不虛尋。南堂流徵偶然興。人物蘭湖總覺忙。驚動蒼龍歸歎息。濤箋書破起寒芒。

古裝

古裝字願來，小字拾影，號影堂，新會古岡人，族姓湯。吳兵入粵，湯氏遇害者三十餘口，古裝方在襁褓，婢負逃出，置草坡上，僧唯一偶見其影，拾養之，名拾影。四歲能賦白蓮詩，長參角子禪師。初角子夢唐僧陳玄奘入室，明日古裝來，參語甚合，付衣鉢改名古裝應夢也。著有虛堂詩集，蠹餘集。

檢亡友哉明浩然昔與予登岳陽樓詩感賦

憶昔少年時。性好遊山澤。携我二三友。岳陽眺秋色。淼淼洞庭湖。萬里正空碧。長風動地來。波濤撼不息。日月在其腹。吞吐從所適。各自賦新詩。縱橫展笑劇。意氣無宇宙。安知吳楚圻。茫茫三十載。往事如陳迹。開篋見君詩。忍淚一拂拭。死去則已矣。生者情何極。有奇誰共探。有義誰與析。黯慘獨無言。蟲聲吼虛壁。

奉和遠公移錫是岸精舍

崢嶸高閣截雲根。地湧浮丘勢更尊。五嶺河山天外落。三城人物鏡中翻。登臨易得同佳節。作賦難逢是故園。老我歸來秋又晚。不堪重自論風幡。

庚寅元日承心公見過以詩枉示賦此奉答

城頭曙色動芳辰。城下衣冠拜慶頻。有客獨尋芳草徑。是誰高臥故園林。道從寂寞身方貴。詩到尋常律乃神。日化月遷都未了。與君終擬作閒人。

山行

出門無定所。一路喬松陰。流水道人意。青山太古心。偶然乘興往。不覺入雲深。獨坐發長嘯。蕭蕭風滿林。

陳顥菴先生讀願來詩絕句云。身世淒涼付劫灰。有緣拾影出塵埃。詩僧卓犖人間世。何必玄師再世來。新詩意氣挾空青。山抱匡廬水洞庭。人道釀花成蜜手。(凌揚藻謂願來神明於襄陽杜陵得意之句，遂成偉觀釀花蜜手也)須知王孟在神明。

古汝

古汝字似石，瓊山人，十歲衣緇，己亥登具。隨禪師杖履特久，超悟拔萃，蓋海外奇珍也。

紫玉臺

洪崖百尺仰晴峯。映日含煙出半空。愛景獨尋臺上路。探奇那避石頭風。青山特矗浮雲外。江水平連遠樹中。古寺疏鐘催暮色。寂寥楓葉染天紅。

古住

古住字正十，湖廣黃梅人，行腳至棲賢，參石鑑禪師，留侍二六年，時中勤參懇證，會禪師分座怡山，與枯吟龍公內外調護，叢席再振。洎石公退歸匡嶽，翩然相從，辛亥奉石公返廣州，居雷峯未幾，以行乞參詢往來各山，後傷師資迅逝，機緣未契，悒悒成病，返匡廬住靜，溘然奄化。

從石鑑和尚初至長慶賦呈
棲賢谷裏一株松。移向西禪植暮冬。風雪當門宜密護，水雲深處記行踪。掃開苔鎖林間室。盡露煙橫海上峯。二十年前尋底事。側聽霜應鼓山鐘。

九鯉湖

廟筵長日薦江籬。湖上相逢說夢痴。一枕落花驚睡蝶。滿庭春雨送龍髭。紅塵已厭身如幻。綉被猶尋覺後移。樂令清言曾憶否。何勞仙老解人知。

古邈

古邈字覺大，番禺羅氏子，童年因從父作蔭株公得禮雷峯為驅鳥長。居頃之，出海幢，求阿字大師剃染受具。天老人還雷峯，入侍丈室。洎再返棲賢，相從高隱。後奉命之福州，長慶。掃除叢席，候老人式臨。暫充典客，與閩中諸名士往來倡和為法喜之會，竟以病入涅，大為緇素所惜。邈幼未經師授，而矢口成文，皆有精義，雖耆宿有所未逮。研苦參究，駸駸脫穎，年之不永，良可軫也。有閩中吟草一卷。

早春臥病鄺榮菴園書寄山中道侶

自從違舊侶。池館少相尋。抱疾兼為客。祛愁強獨吟。乳禽啼舌變。寒柳發春陰。久負閒宵集。草堂清夜深。

白雲景泰寺

入盡翠微路。松門面面開。自無塵跡到。空見白雲來。勝概知何代。登臨未欲回。風泉如有意。曲曲下巖隈。

遊羅浮回宿憩院

中宵獨不寐。萬象總蕭然。隔水來寒磬。西峯落夜泉。月高霜氣重。風急雁聲偏。明日羅浮路。回看何處邊。

掃花

濃濃開更落。寂寂復相親。猶自憐殘蕊。那堪踏作塵。拂來春帶恨。飛去蝶傷神。問砌幾回掃。東風最惱人。

留別高雲客

欲理還山楫。秋風葉正飄。長憐談劇省。又作別離遙。帆影分烏石。湖光到紫霄。幾時尋舊約。携手薊雲橋。

海雲山樓春霽

海天不盡高樓接。風物依依入望寬。新柳拂橋搖綠水。野雲歸戶失朱欄。杜鵑聲裏終何恨。蝴蝶枝頭也解歡。珍重春光澄霽好。幾人乘興共盤桓。

送允執上人歸揚州

歷歷秋山滿眼青。維揚千里羨孤征。野行覓句隨流水。旅宿安禪對月明。驛路菊黃霜漸冷。長江楓落雁初橫。廬峯舊有

他年約。莫使橋西遂隱名。
暮秋寄光半師

搖落平林一逕虛。鹿麋相伴獨吟徐。清冷遠水歸寒澗。蒼翠羣峯入小廬。地僻經秋人跡絕。天寒昨夜雁聲初。疏籬開盡重陽菊。不見支公半載餘。

奉和老和尚梅影

瘦骨橫斜夕照中。依林傍砌意何窮。漫將幻質憐冰雪。卻厭繁華惹蝶蜂。遲月入樓香尚遠。倚風臨水色全空。當時不與羣芳競。顧影寧辭雨露同。

一自孤山多逸興。何如此夕最堪思。板橋霜滑花開後。茅屋燈殘月上時。獨放狂歌憐好景。誰將幽夢破空枝。寒巖雪夜須珍重。雲外孤蹤未易期。

過中宿峽

百尺嵯峨兩岸齊。舟人報道是清溪。風高煙盡帆檣出。日午峯迴峽影低。林映佛燈疏磬度。崖懸春樹野猿啼。綠波青草深深棹。恰似桃花客路迷。

姑蘇懷古

山圍長廓水臨門。想見當時勝事繁。草木枯榮歸曉露。市朝遷變問高原。幾年已泄夫差恨。終古難招伍相魂。顧我閒遊雲水伴。短筇何事立黃昏。

還山留別曾常仲

跡同孤鶴亦言歸。多半生涯在翠微。便趁秋風携篋笠。遙尋落葉到山扉。榕城衰草客心怯。劍浦寒流帆影稀。更有前頭懷抱在。月明清夜憶玄暉。

已未除夕

草草年過三十餘。今宵又是一年除。浮沉底事堪誰論。落莫閒情亦自如。城漏倚風催短臘。山光隨雪到寒廬。頻添檣柁擁爐坐。不覺鐘聲報曉初。

春日客恰山東高雲客陳子盤

久客誰當問此心。日長搔首獨成吟。林邊雨過煙光淡。殿角霜餘柏影深。孤鶴不妨憐淺草。野雲何必戀高岑。西郊近已

無戎馬。宗許乘春或可尋。

九日寄陳子盤兼呈社中諸公

原草離離帶曉霜。雁聲初度海天長。孤籬每獨登高頂。令節何人到上方。松葉有風堪自愛。菊花無酒也須嘗。龍山絕倒東籬劇。肯信林巒幽趣強。

詠菊

仄徑荒林寄一枝。幾回榮落負東籬。碧天雁過情何限。紅葉霜深意自奇。帶月似懷高士恨。倚風仍惜白雲期。蕭蕭向晚憐清影。靜夜幽香欲待誰。

滿抱冰心獨不知。寒窗疏雨好相期。既同荒草栖籬落。寧忘深雲戀石墀。孤影鬥霜凡幾度。叢英浥露亦多時。天邊已自成三逕。豈必長歌歸去辭。

(未完)

新茁楊枝遍大千

好嘗甘露趁春先

同圓福慧雙修願

歡樂一年勝一年

甲寅歲首獻詩恭賀

佛光注照
新年如意

妙法精舍住持金山

妙法寺住持洗塵敬祝

內明書院院長鄧潤棠

附啓：本寺、舍新歲建壇禮拜 萬佛寶懺已歷有年仍當循例舉行

妙法寺自元旦淨壇起香至十四日完懺十五晨九時齋天

妙法精舍自元旦淨壇起香至二十一日完懺是晨九時齋供三寶諸天是夕

設放吉祥普濟瑜伽餞口壇期之內每日正午敬治蔬齋供 佛及衆以上功

德迴向世界和平

佛法興通羣倫樂利護法善信福慧雙增屆時

希蒞臨拈香修懺同結法緣無任企幸